



Communicaziun a las medias

Impuls live da Domat/Ems

Cuiria, ils 30-10-2018 – «Sin il viv!», la turnea per festivar ils 25 onns da l'emissiun *Impuls* da Radiotelevision Svizra Rumantscha (RTR), sa ferma durant ils Dis da Litteratura (DDL) a Domat/Ems. La setavla ed ultima occurrenza ha lieu dumengia, ils 4 da november 2018 a las 10:30, en il salun da coiffeur Haaratelier a Domat/Ems.

Per quest finale vegnan a preleger ils trais pli novs auturs da l'emissiun *Impuls*, numnadamain Carlo Beer, Sidonia Pazeller, Jessica Zuan e l'autura Myriam Pelican. Visitadras e visitaders pon udir texts novs e vegls, divertents e trists davart las rimas tranter las lingias (il tema dals DDL), sur dal scriver per survivor, sur da chignons ed autras frisuras, da sfendachavels u da gliued cun pail sin ils dents.

Er grazia a l'emissiun *Impuls* è la scena da litteratura rumantscha oz viva e vasta sco anc mai. Questa ultima ediziun da «Sin il viv!» metta perquai il focus sin l'aspect impurtant da la promoziun da «novAs auturas» che l'emissiun *Impuls* fa dapi il 1993. Las redacturas responsablas per ils *Impuls*, fin 2016 era quai Rita Uffer e dapi lura Flurina Badel, han numnadamain adina er ina funcziun da tschertgatalents. Pliras auturas e plirs auturs han fatg lur emprims pass litterars en il public cun scriver *Impuls*.

Uschia per exempel er Sidonia Pazeller (*1998), actualmain la pli giuvna autura d'*Impuls*, che vegn a preleger. La giuvna da Tarasp scriva pir dapi quest atun per l'emissiun *Impuls*. Per ses texts gioga ella gugent cun clichés e scriva adina cun ina buna purziun umur. Carlo Beer è creschi si a Sedrun e studegia reschissur e librettist da film a la Scuola Auta d'Art. Era el na scriva anc betg ditg per *Impuls* e n'ha uschiglio anc mai publitgà ses texts, persuerter scriva el istorgias che van sut la pel.

Pli enconuscenta è la poetessa Jessica Zuan da Segl-Maria. Ella ha publitgà cun success ses emprims tom da poesias «L'orizi / La tempête» l'onn passà. Per l'emissiun *Impuls* scriva e publitgescha ella uss per l'emprima giada er texts da prosa: istorgias poeticas da ses mintgadi a Barcelona, là, nua che Jessica Zuan viva cun sia famiglia. La quarta autura da quest quartet empermettent è Myriam Pelican. Ella scriva ses *Impuls* en il dialect da Domat gia dapi l'onn 2011.

La turnea è publica, l'entrada libra. L'occurrenza ha lieu en il Haaratelier, Gassa Sutò 43a a Domat/Ems.

Dapli infurmaziuns

RTR, Tamara Deflorin, scheffa communicaziun, tel. 081 255 75 09, tamara.deflorin@rtr.ch